

Die Rören czw legende vnd wie men Das Wasser In die stadt vnd In ander orter leiten vnd Brengen Sol Do denne hir Der E: Radt Über dy Mule vnd vber Den Roremeisther Reth vnd do Ich auch keinen Radt czw weiß vnd wi Ich Den das kon. Maj. In Dennemerken meinem genedigen hern weither geschriben habe auß Welchen Briefen Do Ich E. f. g: Die kopie von gesanth habe Bey her Cristoffer Beyer wie vorgeschriben. —

Also kumpth nw Disser Jacob Ditterich widder czw mir vnd Bogerth Das Ich Im den Briff thun Szol Den mir sein kon. Maj. mein genedige herre geschriben hoth Also magk ich Im Den selbigen Briff nicht thun es wern Denne Das mir: E. f. g: Do vmen schrybe Sunder die kopie auß Dem selbigigen Brife wil Ich Im gern mith thun An: E: f. g: wie folgeth. —

Dem Ersamenn vnsernn lieben Besondern Jacoff Campenn
Bürgern der Stadt Danczigk.

Christian von gottis genaden zw Dennemarcken Norwegen der
wenden vnd gotthen konigk herczogk zw Slesewigk Holsteinn
Stormarenn vnd Der dithmarschen, graff Czu oldenburgk vnd
Delmenhorsth.

Vnsernn genedigenn groß vnd geneigtenn willenn zuvornn Ersamer
lieber Besonder wir wollenn euch genediger meinunge nicht Bergen Das
wir willens alhir eine wasser kunsth Machen Zw lossen dyweyle Es vns
aber ahnen Rören Mangelth Szo haben wir Dennoch gegenwertigenn meister
Jacoff Dithrich noch Danczigk vns solche Roren Szo Czw Der wasser
kunsth Dinlich mith ewer hulffe czw wegen czw Brengen vnd hieher Czw
Schicken abgefertigeth, Begeren Daruff gancz genediglich Ir Wolleth ge-
melthen meisther Jacoffen behulfflich seyn Damith er Czwe hunderth
gutter Roren bekummen moge Ime Do czw ein schiff außzurichten Diselbigenn
an vnsern Czolner zw hellischenäre schickenn Waß sie also allenthalben
gesthehen von vnserntwegen außlegen vns solche auß gaben verzaichent
vbersenden wollen wir euch genediglichen erlegen vnd Beczalen lossenn
euch hir Inne guthwilligk erzeigen wollen wir In Sonderen genaden hin-
widder vmb euch erkennen Datum vff vnserm kon. Slosse Coppenhagen
In Vigilia Thome. Ao CXLII.

Christian.

Szo mith thu ich mich In E: f. g: gunsth Befelen geschriben Czu
Danczke am Dinstage¹⁾ vor mithfasten Ao. 49.

—. Ich hoffe Jo Das E: f. g: meine Brife neben der kopien Bey her
Christoffer Beyer vff preussche merckt entfangen haben vnd Disser

1) A.-V. giebt das Datum, wohl aus Versehen, Sonntag vor M. F.